

四庫全書

史部

欽定四庫全書

欽定續通志卷六百三十四

逆臣傳

元八

特克實

博囉特穆爾

特克實故丞相特們德爾義子也當英宗初即位由翰林學士承旨為宣徽太醫二院使至治元年特授御史大夫佩金虎符領忠翊侍衛親軍都指揮使依前太醫

院使如故既又命領左右阿蘇衛軍治書侍御史索諾木者特們德爾子也先以罪罷特克實請復其官帝不許巴爾濟蘇亦特們德爾子曾受司徒劉夔賂夔以罪誅而巴爾濟蘇亦棄市時特們德爾既死罪惡日彰帝任拜珠為右相思欲振立紀綱以進賢退不肖為急務特克實以姦黨不自安潛蓄異圖三年秋八月帝自上都還駐蹕南坡是夕特克實與知樞密院事額森特穆爾諸王額特布哈等以特克實所領阿蘇衛兵為外應

殺右丞相拜珠特克實直犯行幄手弑帝于卧所九月
四日晉王即位特克實及其黨皆伏誅

博囉特穆爾河南行省丞相達實巴圖爾子也從父討
賊屢立戰功語具父傳父歿博囉特穆爾引兵退駐井
陘口順帝至正十八年命為河南行省平章總領其父
軍擊走劉福通於衛輝進克濮州復曹州詔移鎮大同
為京師捍蔽置大都督兵農司分十道專理屯田命博
囉特穆爾領之二十年除中書平章事先是有察罕特

穆爾者奮義起兵沈邱踰太行復關陝以功拜河南行
省平章與達實巴圖爾名位不相下

先是以下據察罕特穆爾傳增至

是朝命博囉特穆爾守石嶺關以北察罕特穆爾守石
嶺關以南時山西晉冀地皆察罕特穆爾故所平定博
囉特穆爾既駐大同欲涎吞晉冀遣兵圍冀寧三日復
退屯交城察罕特穆爾以兵來爭博囉特穆爾敗之帝
遣平章達實特穆爾往諭令和解始罷兵各守分地二
十二年博囉特穆爾募兵五萬增戍大同帝嘉其忠拜

太尉中書平章位第一是歲察罕特穆爾為叛將田豐
王士誠刺死義子庫庫特穆爾代領其衆明年博囉特
穆爾復遣兵南侵庫庫特穆爾分地進據真定初朝廷
既黜御史大夫魯達實安置東勝州帝別遣官官密諭
博囉特穆爾令留軍中而皇太子累遣官索之博囉特
穆爾匿不發二十四年博囉特穆爾陰使人殺其叔父
左丞伊德爾布哈佯為不知往弔又不哭朝廷知其跋
扈初立衛屯田嘗命中書右丞額森布哈提督與圖沁

特穆爾分院之地相近因擾及其親里構成嫌隙額森
布哈乃譖圖沁特穆爾詆毀朝政博囉特穆爾與圖沁
特穆爾相友善且知其誣遣人白其非罪皇太子以博
囉特穆爾握兵驕悍今乃與圖沁特穆爾交通又匿不
軌之臣遂與丞相吹斯戩宦者保布哈議請詔削其官
爵勒解兵權安置四川

宦者云云據保布哈傳增改

博囉特穆爾知

非出帝意乃殺使者拒命圖沁特穆爾亦與之合聲言
欲除君側之惡竟舉兵入居庸至清河列營將犯闕帝

遣使問故以必得吹斯戡保布哈為辭帝不得已執畀
之二人皆被殺圖沁特穆爾自健德門入見帝延春閣
慟哭請罪帝賜宴慰勉詔復博囉特穆爾官依前守大
同以圖沁特穆爾為中書平章博囉特穆爾既還大同
太子恚怒不已請帝詔庫庫特穆爾總諸道軍討之庫
庫特穆爾聞命將藉是以釋私憾乃大發兵調麾下白
索珠原脫白字據明史庫庫特穆爾傳增謹識守護京師青軍楊同僉守居
庸而自將至太原調督諸軍博囉特穆爾惡其軋已也

復勒兵與圖沁特穆爾魯達實等犯闕京師大震時太子親統兵迎於清河丞相伊蘇詹事布呼齊軍於昌平伊蘇軍無鬪志楊同僉被殺布呼齊戰敗遁走太子急馳還都遂與白索珠魯本宮官屬出奔太原博囉特穆爾駐兵健德門外欲追襲太子魯達實力止之入見帝於宣文閣泣拜訴寃帝亦泣乃賜宴就命博囉特穆爾為太保左丞相魯達實為中書平章圖沁特穆爾為御史大夫部屬將士布列台省總攬國柄尋加博囉特穆

爾開府儀同三司上柱國錄軍國重事太保右丞相節制天下軍馬數月間誅狎臣圖嚕特穆爾布達幹爾密等罷三宮不急造作汰宦官減浮費禁西番僧人作佛事數遣使請太子還朝使至太原拘留不報二十五年太子在外日夜謀靖內難密下令調嶺北甘肅遼陽陝西及庫庫特穆爾等軍進討博囉特穆爾博囉特穆爾怒出皇后奇氏于外幽置百日遣圖沁特穆爾率軍攻上都之附太子者調伊蘇南禦庫庫特穆爾軍伊蘇謂

博囉特穆爾悖逆中外同憤遂提兵歸永平遣人西結
太原東連遼陽諸王共討軍聲大振博囉特穆爾患之
遣驍將姚巴延布哈統兵出禦至通州河溢伊蘇出不
意襲破之擒姚巴延殺之博囉特穆爾大恐自將出通
州大雨三日而還意抑鬱不樂乃日與魯達實縱飲荒
淫無度酗酒殺人喜怒不測人情攜貳帝亦積不平威
順王子和尚受密旨與儒士徐士本謀結勇士上都瑪
勒金諾海拜達勒特古斯布哈哈喇哈達洪巴拜等陰

圖刺之會圖沁特穆爾遣人來獻上都之捷博囉特穆爾入奏行至延春閣下拜達勒自衆中躍出刃中其腦上都瑪勒及諾海等競前斫死之魯達實傷額趨出得馬走其家擁博囉特穆爾母妻及其子添寶努北遁詔盡殺其部黨遣使函博囉特穆爾首往太原亟召太子還宮尋獲圖沁特穆爾魯達實皆伏誅

欽定續通志卷六百三十四

欽定四庫全書

史部

欽定續通志卷六百

三十五至
四十

侍講學士_臣羅國俊覆勘

總校官原任侍講_臣王燕緒

欽定四庫全書

欽定續通志卷六十三

四夷傳

臣等謹按歷代史例有外國各傳尋考質實舛誤
恒多良由史臣記載失真邊陲外境荒遠遼邈得
諸傳聞未能親歷省記自來外志如釋法顯佛國
記釋元奘大唐西域記趙汝适西蕃志之類彼此
不同唐書載骨利幹部所居之北晝長夜短日入

烹羊胛熟東方已明今攷之極北諸部北極出地
度最多之處日出入均有晷刻並無晝長夜短之
事又古今地名土音年久互異漢之大月氏至唐
而名厥噠後訛為挹怛元魏時之鉢和至唐而為
護密隋之堅昆至唐而為黠戛斯唐之吐蕃至宋
而為嘉勒斯賚青唐指不勝屈漢書匈奴西域傳
所載山川各名相去道里後來唐書宋史亦不相
侔唐宋史所載諸國証以元之聖武親征記復多

不合至若大小頭痛之山赤土身熱之阪此後閩
焉無聞可知傳述之誤矣唐初務勤遠略徧置都
護紀載較詳自安史構亂吐蕃陷河隴回紇飲渭
川荒外諸庭寢以失考五季中土倣授無能及遠
宋則幅員較隘僅識職貢所通者北陲遠隔契丹
無怪外紀之闕遼金史惟西夏高麗有傳元初底
定朔陞又親征西域諸國南及大理並易置君長
以親王駙馬鎮守王略不為不廣顧藩封世襲俱

入列傳外國自高麗外僅載東南瀕海諸夷茲依
鄭志輯四夷傳並以正史為據史所略者無緣更
詳若夫荒誕無稽者槩從芟削間有史氏互見名
目稍歧遽為歸併恐致淆誤亦並存之以附闕疑
之義仍各為之詳考附訂焉

高麗

百濟

新羅

耽羅

渤海

定安

日本

流求
毗舍耶

高麗本曰高句驪漢時扶餘別種常居之其地東至新羅南至百濟皆跨大海西北渡遼水接營州而靺鞨在其北其都平壤城即漢樂浪郡依鴨綠江為險唐武德三年遣使者封其王高建武為遼東郡王太宗時其東部大人蓋蘇文作亂殺建武立其弟之子藏為王帝遣使拜藏為高麗王會新羅上書言高麗侵擾遣使諭止之不從于是帝自將伐之攻圍安市城不克而還乾封元年蓋蘇文死九月以李勣為行軍大總管率師討之

三年二月師圍平壤以九月克之執藏等獻俘闕下赦
藏為司平太常伯即其地置安東都護府儀鳳二年復
藏朝鮮郡王還鎮藏謀叛未及發召還放邛州死聖歷
初以藏子德武為安東都督後乃稍自立國元和末嘗
遣使來獻樂工後唐長興中王建代高氏遂并新羅百
濟高句麗為一徙居松岳號東京平壤為西京遣使朝
貢累封高麗國王晉開運二年建死傳子武漢乾祐末
武死傳子昭宋建隆三年昭遣使朝貢四年以昭為開

府儀同三司檢校太師玄菟州都督大義軍使高麗國
王開寶中昭卒其子佃權領國事遣使貢授佃檢校太
保玄菟州都督大義軍使封高麗國王太宗即位加檢
校太傅改其軍為大順軍太平興國二年遣子元輔來
貢三年加佃檢校太師七年佃卒其弟治權知國事遣
使求襲位授檢校太保玄菟州都督大順軍使高麗國
王雍熙元年又遣使貢二年加治檢校太傅三年用兵
于契丹以其國接契丹常為所侵遣監察御史韓國華

齊詔諭令發兵西會十月遣使朝貢端拱元年加治檢
校太尉二年遣使來貢淳化元年三月加治食邑遣戶
部郎中柴成務等往二年遣使來貢三年遼使蕭恒德
伐之四年正月治遣使貢方物二月加治檢校太師是
年治遣使詣遼請罪遼取女真近鴨綠江地益之遂與
遼通好五年六月遣使元郁來懇遼人侵境乞師朝廷
以北鄙甫寧不可輕動于戈賜詔慰撫厚禮其使遣之
自是受制于遼朝貢中絕

按遼史統和十三年治遣使
入貢進鷹十一月冊治為王

即是時
事也

至道三年

宋史不載今據
遼史年月補入

治卒弟

遼史
作姪

誦立咸

平三年其臣朱仁紹至登州偵候朝命名見因賜誦詔

六年誦遣使李宣古來謝恩且言自晉割燕薊屬契丹

遂有路趣玄菟屢來攻伐求取不已乞王師乞備詔優

答之

按遼史統和十六年遣使冊誦為王二十年七月
來貢奉國地圖二十三年遣使來賀與宋聯和二

十八年遣使來祭承天皇后復來會葬誦卒弟詢權知國事

按遼史統和二
十八年高

麗西京留守康肇殺其主
誦立其從兄詢與此互異

築六城曰興州鎮州通州龍

州龜州郭州于境上遼以為貳已遣使求城詢不許遂

舉兵至城下焚劫居人詢徙昇羅州避之兵退遣使請和而遼堅以六城為辭乃調兵戍守大中祥符三年遼

大舉伐之詢與女真設奇擊殺遼軍殆盡

按遼史是年大軍渡鴨綠

江康肇拒戰于銅州敗之肇復出耶律達魯擒之追奔數十里銅霍賁寧等州皆降詢表請朝許之與宋史所

載殊異

又于鴨綠江東築城與來遠城相望跨江為橋潛

兵以固新城七年遣使來貢八年詔登州置館以待使

者其年遣使耶元來貢天禧元年遣使奉表獻方物

按遼

史統和二十八年遣排押博能攻開京詢棄城遁焚開京二十九年班師所降諸城復叛開泰元年詢乞稱

臣詒詢觀朝奉詔稱病詔復取六州之地五年
至八年數出師伐高麗九年收詢降表釋其罪
五年詢

卒

按詢之卒宋史原載在天聖八年遼史載在聖宗太平元年係宋真宗天禧五年二史互異茲據遼史改

子欽襲位會遼使冊欽為王遣使來言與遼修好天聖

八年復遣使入貢欽卒

按遼史與宋重熙間王欽凡四遣使入貢

子徽襲位

先是使人至汴往反皆自登州熙寧七年遣使來言欲

遠遼乞改由明州詣闕從之元豐元年遣陳睦往聘六

年徽卒

按遼史重熙二十三年王徽請官其子詒加檢校太尉清寧元年使來會葬興宗四年使來會

葬太皇太后太康四年徽乞賜賜錄江以東地不許

子勲權知國事百日卒弟運

立遼史作八年遣其弟僧統來朝哲宗即位遣使來賀

元祐五年復通使七年遣使來獻黃帝鍼經請市書甚

衆禮部尚書蘇軾言高麗入貢無絲髮利而有五害今

請諸書與收買金箔宜勿許詔許買金箔然卒市冊府

元龜以歸運立四年卒

按遼史運立千太康十年卒于大安十年凡在位十一年與宋

史子堯嗣未閱歲以病不能為國叔熙攝未幾堯卒熙

立凡數歲貢使不至

按遼史運卒子昱立昱病命其子顯權知國事顯即熙避遼天祚帝

妹名而改則昱即堯也遼史以顯徽宗立遣使弔賀宗

為昱子此以為昱叔父亦互異

寧二年詔戶部侍郎劉遠等往使熙卒

按遼史壽隆元年王旦病命顯

權知國事三年王旦卒封顯為三韓公乾統五年顯卒熙在位凡九年

子侯

遼史作侯

嗣貢使接

踵宣和四年侯卒

按遼史乾統五年封侯為三韓國公十年乞兵于高麗以幣金金人貢之

亡子楷嗣詔遣使奠慰初侯求醫於朝詔使二醫往留

二年歸欽宗立賀使至詔館留明州納其贄幣高宗即

位慮金人通高麗命胡蟲使其國以間之建炎二年浙

東路馬步軍都總管楊應誠上言由高麗至女真路甚

徑請身使三韓結鷄林以圖迎二聖乃以應誠充高麗

國信使六月抵其國諭楷以所欲為楷不奉詔十一月
楷遣其臣尹彥頤奉表謝罪是時金使至其國責以遣使
往來當盡循遼舊仍取保州路及邊地人口在彼界
者楷附表謝請依事遼舊制并請免索亡人戶口金主
從之先是高麗雖與宋通使不絕然受遼封冊奉其正
朔及金滅遼以事遼之禮事金紹興二年閏四月楷遣
使入貢楷卒子昉嗣立三十二年三月其綱首徐德榮
詣明州言本國欲遣賀使守臣韓仲通以聞殿中侍御

史吳芾奏高麗與金接壤懼其為間詔止之自是終宋
之世不至其後昉弟皓廢昉自立以讓國至金奏告金
主疑之以詔書詳問其國士民使至高麗皓稱昉避位
如前奏使還皓又遣使請封大定十二年三月賜封冊
十五年其西京留守趙位寵貳于皓遣徐彥寧等至金
上表稱皓弑昉狀且請以慈悲嶺西至鴨綠江四十餘
城內屬不許項之皓定位寵之亂遣使謝承安三年皓
表自陳衰病讓其弟暉權知國事是歲皓卒暉嗣立泰

和四年諱卒子猷嗣立至寧元年八月猷卒明年宣宗
遷汴遼東道路不通元太宗三年高麗王瞰遣其弟促
至元請和太宗許之自後叛服不常定宗憲宗俱嘗遣
兵討之世祖中統元年三月瞰卒子植襲位

植初名供

屢遣

使貢又親入朝至元三年二月立瀋州以處高麗降民
帝欲通好日本以高麗與之鄰可為鄉導八月遣黑的
等使日本先至高麗諭旨黑的未至日本而還五年正
月詔諭植以伐宋使助士卒舟艦糧儲九月植遣其臣

同使者往日本亦不能違六年八月植世子愷來朝奏
本國權臣林衍廢植立弟湏事詔授愷特進上柱國遣
孟克圖伐之十月復遣使往諭植湏衍等同詣闕下面
陳是非植受詔復位遣使表謝十二月親朝京師七年
正月以其西京內屬詔改東寧府畫慈悲嶺為界孟克
圖為安撫使率兵戍之并諭其國僚屬軍民討林衍衍
尋死餘黨竄珍島討敗之八年正月植遣使奉表請婚
十一年三月遣使諭高麗助征日本五月皇女和塔拉

都哩默色下嫁其世子懋七月祖卒詔懋襲爵十二年十一月遣使諭懋改官職名號懋遣其帶方侯王澈入侍十三年七月遣使來賀平宋十一月懋遣使奏改名懋十四年正月金方慶等為亂命懋治之十五年遣兵戍忠清金羅諸處七月改鑄駙馬高麗王印賜懋十七年五月國饑乞貸糧萬石從之十月進懋開府儀同三司中書左丞相行中書省事十八年二月懋言本國筆且齊不諳行移文字請除郎中員外各一員為參佐又

請易宣命職銜增駙馬字從之十一月置鎮邊萬戶府
于金州等處以控日本十九年正月賸以日本寇其邊
請發蒙古軍五百人戍金州又從之二十年五月立征
東行中書省二十八年五月以賸子諤為世子授特進
上柱國賜銀印十月以其國饑給米賑之三十年二月
賸遣使入奏復更名昝及乞功臣號詔賜號推忠宣力
定遠功臣十一月昝入朝大德元年封昝為逸壽王以
世子諤為高麗王亦尚公主二年七月中書省臣奏諤

有罪復以其父昨為王凡昨復位八年而卒諡復襲王

位

諡後史
名章

生子素素受遜位以仁宗皇慶二年四月襲

封後傳其弟曷曷傳子額高麗自建至額凡二十九王

歷四百餘年中更宋遼金元未嘗易姓云

百濟扶餘別種也濱海之陽南倭北高麗皆逾海乃至

其東新羅也俗與高麗同唐武德四年其王扶餘璋始

遣使獻果下馬自是數朝貢高祖敕為帶方郡王百濟

王後數與高麗新羅相仇殺來告太宗詔使者平其怨

貞觀十五年瑋卒冊其子義慈紹王後與高麗連和伐
新羅取四十餘城又間取新羅七城久之又奪十餘城
屢詔諭解不從顯慶元年詔左衛大將軍蘇定方率軍
合新羅兵討之俘義慈及其太子隆送京師詔釋不誅
析其地置五都督府命劉仁願守百濟城瑋從子福信
據周留城反立故王子扶餘豐為王西部皆應引兵圍
仁願龍朔二年詔右威衛將軍孫仁師為熊津道行軍
總管與仁願及新羅王共伐之豐走遁諸城皆復仁願

勒軍還留劉仁軌代守帝以扶餘隆為熊津都督俾歸國平新羅故憾劉仁軌為之盟辭後隆眾攜散歸京師儀鳳時進帶方郡王遣歸藩畏新羅彊盛寄治高麗死武后以其孫敬襲王而其地已為新羅渤海諸國所分百濟遂絕

新羅并韓苗裔也地橫千里縱三千里東距長人東南日本西百濟南瀕海北高麗朝服尚白其王姓金貴人姓朴民無氏唐武德四年王真平遣使者來朝詔遣使

答賚後三年封樂浪郡王新羅王貞觀五年獻女樂二
人太宗詔還之是歲真平死無子其女善德嗣王大臣
乙祭柄國詔冊善德襲父封二十一年善德死妹真德
襲王高宗永徽元年攻百濟破之遣使入朝真德織錦
為頌以獻五年真德死其弟子春秋襲王明年同蘇定
方平百濟龍朔元年死其子法敏襲王咸亨五年納高
麗叛眾略百濟地守之詔削官爵以其弟仁問為新羅
王自京師賜國詔劉仁軌發兵窮討上元二年法敏遣

使謝罪貢篚相望仁問乃還辭王詔復法敏封然多取
百濟地遂抵高麗南境矣法敏死子政明襲死子理洪
襲死弟興光襲開元中數朝貢又獻二女帝厚賜遣還
又遣子弟入太學二十五年死子承慶襲死弟憲英襲
死子乾運襲建中四年死無子國人共立宰相金良相
嗣王是年死其從父弟敬信襲十四年死無子立嫡孫
俊邕死子重興襲永貞七年死其宰相金彥貞嗣王死
子景徽立會昌後朝貢不復至後唐同光元年新羅王

金朴英遣使來朝貢長興四年權知國事金溥復遣使
來自晉以後不復至其卒立世次史皆失詳宋以後入
于高麗以其地為東州樂浪府號東京而以百濟地為
金州金馬郡號南京云

耽羅高麗與國也宋以前無考

按唐書載有僭羅國居
新羅武州南島上龍朔

麟德間嘗來朝僭
耽音近疑即其地

元世祖臣服高麗以耽羅為南宋日

本衝要亦注意焉至元六年七月遣都統領脫脫兒等
往視道路詔高麗國王王禕選官導送時高麗叛賊林

行餘黨金通精遁入耽羅廷議先平耽羅然後觀日本
從否十年正月命經略實都史樞及洪恭丘等率兵船
往討六月平之於其地立耽羅國招討司後改為軍民
安撫司三十一年高麗王上言耽羅自來臣屬其國乞
仍舊帝許之自是遂復隸高麗

渤海本粟末靺鞨附高麗者姓大氏唐平高麗率衆保
挹婁之東牟山地直營州東二千里南以泥河為境東
窮海西接契丹築城以居高麗遺殘稍歸之萬歲通天

中契丹攻陷營州有舍利乞乞仲象者與靺鞨酋乞四
比羽及高麗餘種東走度遼水保太白山之東北阻與
婁河樹壁自固武后封乞四比羽為許國公乞乞仲象
為震國公比羽不受命詔李楷固等擊斬之仲象死其
子祚榮引殘疾拒楷固楷固敗還祚榮即并比羽之衆
建國自號震國公與突厥交通盡得扶餘沃沮并韓朝
鮮海北諸國中宗時使侍御史張行岌招慰祚榮遣子
入侍睿宗先天中遣使拜祚榮為左驍衛大將軍渤海

郡王以所統為忽汗州領忽汗都督

按渤海自唐初至此皆稱靺鞨睿宗

以其州為忽汗州始去靺鞨之號

開元七年死私謚高王子武藝立改

年仁安帝賜典冊襲王未幾黑水靺鞨使者入朝帝以

其地建黑水州置長史武藝議遣其弟門藝及舅任雅

相發兵擊黑水門藝固諫不聽遣從兄壹夏代將門藝

懼誅來歸詔拜左驍衛將軍後十年武藝遣將張文休

率海賊攻登州帝即遣門藝發幽州兵擊之武藝死私

謚武王子欽茂立改年大興仍賜冊襲王天寶末欽茂

徙上京直舊國三百里忽汗州之東欽茂訖帝世朝獻
者二十九寶應元年始詔以渤海為其國號欽茂進檢
校太尉大歷中二十五來欽茂死私謚文王子宏臨早
死族弟元義立一歲國人殺之推宏臨子華璵為王改
年中興死謚成欽茂少子嵩鄰立改年正歷詔授右驍
衛大將軍嗣王建中貞元間凡四來死謚康子元瑜立
改年永德死謚定弟言義立改年朱雀並襲王如故事
死謚僖弟明忠立改年太始死謚簡從父仁秀立改年

建興仁秀頗能討伐海北諸部詔檢校司空襲王元和
中凡十六朝獻長慶四寶歷凡再太和四年仁秀死謚
宣穆彝震立改年咸和詔襲王終文宗世來朝十二會
昌四彝震死弟虔晃立死子元錫立咸通時三朝獻其
國有五京十五府六十二州以肅慎故地為上京曰龍
泉府其南為中京曰顯德府獺貊故地為東京曰龍原
府亦曰柵城府沃沮故地為南京曰南海府高麗故地
為西京曰鴨綠府長嶺府扶餘故地為扶餘府常屯勁

兵杆契丹又有鄭頤府挹婁故地為定理府安邊府率
賓故地為率賓府拂涅故地為東平府鐵利故地為鐵
利府越喜故地為懷遠府安遠府設官分職多仿中國
制度幽州節度府與相聘問此後朝貢與否史家失傳
梁開平中王大諱謨遣使者來後唐天成初契丹攻扶
餘城下之改扶餘為東丹府其國在五代時常來朝貢
宋太平興國四年太宗平晉陽移兵幽州其帥大鸞河
率其部族來降詔以鸞河為渤海都指揮使六年將用

師契丹降詔諭旨後其國并入高麗契丹云

定安國本馬韓之種為契丹所破其酋帥糾餘衆保于
西部自稱定安國宋開寶三年其國王烈萬華因女真
使附表貢方物太平興國中太宗方經營遠略因降詔
其國令張犄角之勢六年冬其王烏元明又附女真使
上表有高麗舊壤渤海遺黎語詔答之端拱淳化中嘗
兩附女真使上表其後不復至

日本者本倭國直新羅東南在海中島而居小島五十

餘皆自名國而臣附之其境東西行五月南北行三月
西南至海東北隅隔以大山山外即毛人國其俗多女
少男有文字尚浮屠法隋開皇末始與中國通唐貞觀
五年遣使者入朝帝矜其遠詔有司毋拘歲貢永徽初
遣使來獻虎魄瑪瑙賜之璽書咸亨元年遣使賀平高
麗後乃更號日本自言國近日所出以為名長安元年
遣使貢方物其使曰粟田好學能屬文進止有容開元
初粟田復來朝請從諸儒授經詔四門助教趙元默為

之師悉賫物賀書以歸其副仲滿慕華不肯去易名曰
朝衡歷左補闕儀王友多所該識久乃還天寶十二載
復來朝建中元年遣使獻方物貞元末遣使來朝其學
子橘免勢浮屠空海願留肄業歷二十餘年乃還開成
四年復入貢宋雍熙元年日本僧裔然與其徒五六人
浮海至獻銅器十餘事并其國職員及年代紀各一卷
裔然善隸書問其風土但書以對云國中有五經書及
佛經白居易集並得自中國土宜五穀而少麥交易用

銅錢文曰乾元大寶畜有水牛驢羊多犀象產絲蠶多
織絹四時寒暑大類中國國之東境接海島東與州產
黃金西別島出白銀以為貢賦有五畿七道三島國王
以王為姓傳襲已六十四世文武僚吏皆世官王先以
尊為號其後乃以天皇為號太宗召見裔然存撫之賜
紫衣館于太平興國寺裔然求詣五臺許之令所過給
食又求印本大藏經詔亦給之二年歸國後數年裔然
遣其弟子喜因奉表來謝咸平五年建州海賈周世昌

遭風至日本凡七年得還與其國人藤木吉至皆召見之景德元年其國僧寂照等八人來朝天聖四年十二月明州言日本國太宰府遣人貢方物而不持本國表詔却之熙寧五年有僧誠尋至天台止天台國清寺願留詔使赴闕以其遠人而有戒禁處之開寶寺後連貢方物其來者皆僧也乾道九年附明州綱首以方物入貢元世祖至元元年以高麗人趙彝等言日本國可通三年八月命兵部侍郎赫德充國信使由高麗使其國

赫德等不至而還四年六月帝以高麗國王植託辭為
解復遣赫德等諭植植以為海道險阻不可辱天使遣
其起居舍人潘阜等持書往日本亦不得要領而歸五
年九月命赫德等持書往至對馬島日本人拒不納六
年十二月命秘書監趙良弼充國信使持書至高麗通
好日本八年九月良弼至其國太宰府而還九年二月
高麗王植致書日本五月又以書往皆不報十年六月
趙良弼復使日本十一年七月命鳳州經略使竇都高

麗軍民總管洪恭立帥舟師往征十月入其國十二年
二月遣禮部侍郎杜世忠等往使十七年二月杜世忠
等為其國所殺十八年正月命日本行省右丞相阿嚙
罕右丞范文虎及征東元帥實都洪恭立等十萬人往
征六月阿嚙罕病不能行命安塔哈代總軍事八月諸
將未見敵喪師而還二十年命安塔哈為日本行省丞
相募兵造舟將復征之淮西宣慰使昂吉兒上言民勞
乃寢兵二十一年又以其俗尚佛遣王積翁與補陀僧

如智往使積翁等為其下所殺不果至大德三年又遣僧使其國亦不報終元之世不通

流求國亦曰瑠求在南海之東與漳泉諸州相對西南北岸皆水至澎湖漸低近其國謂之落滌滌者水趨下而不回也國小而險塹柵三重環以流水植棘為藩以刀稍刀矢劒鼓為兵器沃壤無賦斂視月盈虧以紀時無他奇貨故商賈不通宋淳熙間其酋豪嘗率數百人猝至泉之水滬圓頭等村肆掠喜錢器人閉戶則利其

門園而去縛竹為筏急則羣舁之泗以適元世祖至元
二十八年以海船副萬戶楊祥充宣撫使持詔往諭竟
不能達其旁有毗舍邪國亦語言不通又有三嶼國亦
近流求居民不及二百戶時有至泉州為商賈者

欽定續通志卷六十三十五

欽定四庫全書

欽定續通志卷六百三十六

四夷傳 二

突厥

回鶻 尾特勤

薛延陀 拔野古

僕固 同

羅契必 多覽葛 跌跌

黠戛斯 伊州 都

葛邏祿 拔悉蜜

播 骨 利

幹 白霄

奚

室韋諸部落

斛薛

突厥阿史那氏古匈奴北部也居金山之陽臣於蠕蠕種裔繁衍至吐門遂彊大更號可汗其別部典兵者二

十八等皆世官控弦之士百萬隋大業之亂始畢可汗
咄吉嗣立人爭附之契丹室韋吐谷渾高昌皆役屬焉
高祖起太原遣府司馬劉文静往聘與連和始畢使特
勤康稍利獻兵馬武德元年骨咄祿特勒來朝賜宴太
極殿二年始畢自將渡河至夏州以兵佐劉武周將侵
太原道死其弟俟利弗設立是為處羅可汗處羅尚隋
義成公主又通王世充又於竇建德所迎請蕭皇后及
齊王暕之子正道立正道為隋王秦王之討武周也處

羅方謀取并州安置正道會病發死不行其弟咄苾嗣
立是為頡利可汗頡利又妻義成義成楊諧女也其弟
善經與王世充使者王文素共說頡利立正道以報隋
頡利然之由是頻歲入寇四年寇鴈門代州犯原州又
寇并州六年寇定匡原朔等州七年攻原朔代隴等州
秦王與齊王帥兵會擊之頡利與其兄子突利連兵起
原州秦王縱反間突利不欲戰頡利乃遣突利請和八
年頡利復攻靈朔及廣武轉掠綏州九年攻原靈又圍

涼州犯涇原其七月頡利自將十萬騎襲武功京師戒嚴進攻高陵為尉遲敬德所敗時頡利遣人請和且覲虛實太宗囚其使與高士廉房元齡等騎出元武門至渭上面責頡利負約賊大駭頡利固請和乃與之盟貞觀元年薛延陀回紇拔野古諸屬部皆叛頡利使突利討之不勝頡利怒囚之突利由是怨望明年突利自陳為頡利所攻求救頡利亦擁兵窺邊時突厥歲饑災異數見諸部皆貳薛延陀自稱可汗以使來拔野古僕骨

同羅諸部雷奚渠長皆來朝於是詔李靖等六總管討之四年正月靖進屯惡陽嶺夜襲頡利其酋康蘇密等以隋蕭后楊正道降頡利奔沙鉢羅為行軍總管張寶相所擒獻俘太廟八年頡利死贈歸義王謚曰荒詔朔方地自幽州至靈州建順祐化長四州為都督府剖頡利故地左置定襄都督右置雲中都督二府統之以突利可汗為順州都督令率其下就部突利初為頡利所攻避難入朝帝厚之拜右衛大將軍封北平郡王至是

為都督頓首聽命後入朝道死并州子賀邏鶻嗣突利弟結社率謀劫賀邏鶻北還謀泄投賀邏鶻嶺外乃立阿史那思摩為乙彌泥孰俟利必可汗賜氏李悉還故地令思摩歸國思摩頡利族人也十五年思摩率眾十餘萬勝兵四萬馬九萬匹渡河建牙於故定襄城居三年不能得其眾請入朝留宿衛卒京師贈兵部尚書夏州都督思摩之歸國也立阿史那忠為左賢王

按新唐書思摩

傳云以阿史那忠為左賢王阿史那泥孰為右賢王本傳則云右賢王阿史那泥孰賜名忠以忠與泥孰為一

人與前傳互異今據阿史那社圖傳及思摩傳改正
常思慕中國思摩既不能率

下民多分處勝夏二州族人車鼻可汗盜其地擁兵出
掠部屬皆患之二十一年遣子沙鉢羅特勒獻方物且
請入朝帝遣安調遮韓華迎之車鼻實無入朝意華與
調遮死帝怒遣高侃發回紇僕骨兵擊之酋長以次降
車鼻走侃追獲之獻京師初其子羯漫陀泣諫車鼻請
歸國不聽乃遣子菴鐸入朝後來降以其地建新黎州使
領其衆於是突厥地皆置都護府領都督及州凡三十

年北方無警自調露後諸部稍叛去遣蕭嗣業討之不
勝流嗣業桂州拜裴行儉為行軍大總管討敗之永隆
中溫傳部又迎頡利族子伏念於夏州立為可汗遂寇
原慶二州復詔行儉進兵縱反間溫傳與伏念貳伏念
北走行儉虜送京師斬之永淳元年骨咄祿又反骨咄
祿者亦頡利族人伏念敗亡命入總材山至是自立為
可汗寇單于府北鄙攻并嵐二州掠定州又攻端州蔚
州嗣聖垂拱間連寇朔代二州明年入昌平復入朔州

天授初骨咄祿死其弟默啜代為可汗復攻靈州武后遣薛懷義等十八將討之不見敵而還尋詔王孝傑為行軍總管備邊契丹李盡忠等反默啜請擊賊自劾詔授為左衛大將軍歸國公拜遷善可汗默啜引兵擊契丹盡忠死進頡跌利施大單于立功報國可汗未及命寇靈勝二州默啜又請以女女諸王詔淮陽王武延秀往納其女默啜怒曰我世附唐以女與天子子乃與后家子乎因延秀自將十萬騎南向擊靜難平狄清夷等

軍詔武重規等擊之默啜破蔚州飛狐進殘定州圍趙
州又攻相州睿宗立請和親開元初絕之默啜遣子揚
我支特勒入宿衛固求婚以蜀王女南河縣主妻之明
年攻北廷都護後默啜為拔野古所殺傳首京師默棘
連襲位是為毗伽可汗八年默棘連請和帝以非誠命
王峻統兵伐之敗還九年又請和許之帝東巡泰山遣
使召其大臣入衛自是比年遣使入朝吐蕃以書約連
結釁邊默棘連不從封上其書帝嘉之後為梅錄啜所

毒死國人立其子伊然可汗八年卒凡遣使三入朝其弟嗣立為必伽骨咄祿可汗冊為登利可汗從父判闕特勒殺之國內亂國人奉其子為烏蘇米施可汗其大部回紇葛邏祿自分左右葉護烏蘇為其下拔悉蜜等三部所殺其弟白眉可汗立國人亦推拔悉蜜酋長為可汗未幾回紇葛邏祿殺拔悉蜜可汗奉回紇骨力裴羅定其國為骨咄祿毗伽闕可汗明年殺白眉可汗自是其地盡入回紇始其族分國於西者曰西突厥當東

突厥啟民可汗立西突厥達頭可汗歲以兵相加而隋
常助啟民達頭遂奔吐谷渾後有統葉護可汗者并國
數十能復達頭之業西突厥遂強其諸父莫賀咄殺之
自立是為屈利俟毗可汗是時統葉護子啞力特勒亡
在康居立為乙毗鉢羅肆葉護可汗與俟毗分王其國
爭戰不已各遣使朝獻弩矢畢部並兵助肆葉護殺俟
毗奉肆葉護為大可汗尋遜之弩矢畢酋泥孰乃自立
為咄陸可汗傳弟啞利失可汗國人遜啞利失立欲谷

設為乙毗咄陸可汗咥利失與之交戰於是西突厥又
分為二咥利失主其東咄陸主其西咥利失死其子乙
屈利失乙毗可汗立踰年死乙毗沙鉢羅葉護可汗繼
之是時咄陸兵強攻葉護殺之并其國入寇伊州為安
西都護郭孝恪所敗後國亂其下不欲咄陸為可汗遣
使請所立帝擇突厥可汗子孫賢者授之乃立乙毗射
匱可汗咄陸奔吐火羅時阿史那賀魯反吞可汗諸部
落自號沙鉢羅可汗入寇為蘇定方等所殺朝廷立阿

史那彌射為興昔亡可汗阿史那步真為繼往絕可汗
二人各領五部賀魯故地立安西都護府彌射後為蘇
海政所殺步真尋亦死儀鳳中西突厥部帥阿史那都
支自號十姓可汗與吐蕃寇安西裴行儉討禽之二部
人並離散五代時後唐同光三年天成二年長興二年
晉天福六年俱嘗遣使朝貢後寢微不顯

回紇即曰鶻其先匈奴也隋曰韋統素臣於突厥大業中

突厥攻之叛去改稱回紇姓藥羅葛氏居薛延陀北娑

陵水側有時健侯斤者衆推為君長其子曰菩薩與薛
延陀共破突厥自號活頡利發貞觀三年來朝菩薩死
其苗胡祿俟利發吐迷度與諸部攻薛延陀并其地來
獻功以回紇部為瀚海府拜吐迷度為懷化將軍瀚海
都督時吐迷度已自稱可汗二十二年吐迷度為兄子
烏紇所殺燕然都護元禮臣紹烏紇斬之詔吐迷度子
婆閏為左驍衛大將軍襲父所領婆閏死子比栗嗣
舊唐書作妹比栗死子獨解支嗣獨解支死子伏帝舊唐書立時

突厥默啜方強伏帝勗助唐攻殺之伏帝勗死子承宗
立涼州都督王君奭誣以罪流死族子瀚海府司馬護
輸乘眾怨殺君奭斷安西諸國貢道久之奔突厥死子
骨力裴羅立會突厥亂裴羅與葛邏祿自稱左右葉護
襲破拔悉蜜自稱骨咄祿毗伽闕可汗詔拜為懷仁可
汗盡得古匈奴地裴羅死子磨延啜立肅宗即位請和
親遣太子葉護助討安祿山以女妻燉煌郡王承寔詔
冊其女為毗伽公主者積之戰陳澧上賊伏騎大營東

回紇攻之盡殪子儀因進收長安大破賊衆安慶緒棄
東京走向紇大掠還京師帝遣使勞之進葉護司空爵忠
義王乾元元年請昏詔寧國公主下嫁冊唐延啜為
英武威遠毗伽可汗復使其王子骨啜等助討明年骨
啜與九節度師潰於相州奔京師帝厚賜慰其意乃還
唐延啜死子移地健立號牟羽可汗使大臣入朝代宗
即位遣中人劉清潭往結好且發其兵助討史朝義朝
義方紿回紇唐已亡使入收府庫移地健引兵南見詔

始知廣平王即天子位時雍王為天下兵馬元帥會其
兵進收東都河北平回紇見城邑榛莽有輕唐之色至
是留屯東都故兵剽掠日益橫肆帝加可汗可敦及察
屬封號永泰初僕固懷恩反誘回紇吐蕃入寇懷恩死
爭長回紇詣郭子儀請降與朔方兵馬使白元光共擊
吐蕃大敗之大歷十三年回紇襲振武入寇太原代州
都督張光晟與戰破之德宗立遣使告喪且修好九姓
胡勸可汗入寇宰相顏莫賀諫不聽顏莫賀因擊殺之

自立建中元年詔冊頡莫賀武義成功可汗後三年使
使獻方物請和親詔咸安公主降之可汗上書請易回
紇為回鶻拜可汗為汨咄祿長壽天親毗伽可汗貞元
五年頡莫賀死子多邏斯立拜愛登里邏汨沒蜜施俱
祿毗伽忠貞可汗為少可敦葉公主毒死幼子阿啜嗣
冊為奉誠可汗是歲回鶻擊吐蕃葛祿於北庭勝之明
年遣使來朝十一年阿啜死無子其相骨咄祿自立詔
拜愛滕里邏羽錄沒蜜施合胡祿毗伽懷信可汗永貞

元年死冊所嗣為滕里野合俱錄毗伽可汗元和初再
朝獻未幾又死冊拜愛登里羅汨蜜施合毗伽保義可
汗聞三歲使者再朝穆宗立固求昏許之俄可汗死冊
所嗣為登囉羽錄沒蜜施句主毗伽崇德可汗詔以太
和公主降之是時裴度方伐幽鎮回鶻使將以兵三千
佐平河北議者懲前患辭使者去敬宗即位可汗死其
弟曷薩特勒立冊為愛登里囉汨沒蜜施合毗伽昭禮
可汗太和六年其下殺之從子胡特勒立明年冊為愛

登里囉汨沒蜜施合句祿毗伽彰信可汗開成四年其
相掘羅勿作難引沙陀共攻可汗可汗自殺國人立盧
駟特勒為可汗俄為渠長句錄莫賀與黠戛斯所殺其
牙部立烏介特勒為可汗時太和公主為黠戛斯所得
遣使奉主來歸烏介擊殺其子劫公主度磧進攻天德
城振武節度使劉沔拒却之公主遣使言烏介已立因
請命詔使慰撫其衆明年回鶻奉主至漠南入雲朔剽
掠因室韋黑沙南闕幽州節度使張仲武破之其屬降

將弘順與劉沔等窮追殺烏介奉公主南還詔勒石幽
州紀功國人立其弟遏捻特勒為可汗收殘部五千仰
食於奚大中初仲武討奚回鶻寢微轉依室韋仲武諭
令羈致可汗等遏捻委部西走是時厖特勒居甘州自
稱可汗有磧西諸城遣人來京師宣宗拜嵬祿登里邏
汨沒蜜施合俱錄毗伽懷建可汗嘗一再進獻後唐同
光中冊其國王仁美為英義可汗仁美卒弟仁裕立遣
使來朝冊為順化可汗晉天福中改為奉化可汗仁裕

卒子景瓊立建隆以後常遣使朝獻景瓊以下系屬無
稽咸平以後族種散處甘州西州新復州天聖初甘州
夜落隔通順來貢方物封歸忠保順可汗宣和中因入
貢留陝西諸州貿易不歸其往來皆經夏國建議立法
禁止之

薛延陀先與薛種雜居滅有延陀部遂號薛延陀姓一
利啞氏鐵勒諸部中最強風俗與突厥同西突厥處羅
可汗之殺鐵勒諸酋也其下相率叛去推契苾哥楞為

易勿真莫賀可汗據貪汗山奉薛延陀乙失鉢為野啞
可汗保燕末山而突厥射匱可汗復強二部黜可汗號
往臣之回紇拔野古阿跌同羅僕骨白靺在鬱督軍山
者東附始畢可汗乙失鉢在金山者西役葉護可汗貞
觀二年葉護死國亂乙失鉢之孫夷男率部附頡利可
汗突厥衰諸姓多叛歸夷男太宗方圖頡利冊拜夷男
為真珠毗伽可汗頡利可汗滅塞隧荒蕪夷男率其部
東保都尉撻山獨邏水之陰浸强大太宗恐後為患詔

拜其二子皆為可汗十五年帝以李思摩為可汗渡河
建牙於漠南夷男惡之攻思摩走詔張儉李勣等討敗
之延陀遣使謝罪因請昏不許明年又來獻馬時李思
摩侵掠其境延陀遣將寇定襄詔李勣追却之俄請助
伐高麗會病死子拔灼立以唐師在遠寇邊詔江夏王
道宗等禦之拔灼眾潰遁去依阿史那時健為回紇所
殺眾立真珠毗伽可汗昆弟子咄摩支號伊特勿失可
汗遣使言願保鬱督軍山詔崔敦禮李勣撫定之因覲

其順逆勅至吐摩支欲拒戰陽乞降勅知之縱兵滅其國吐摩支奔回紇因蕭嗣業以降與延陀國比屬有拔野古居康干河風俗與鐵勒相似貞觀三年與僕骨同羅奚霫同入朝二十一年大俟利發屈利失舉部內屬置幽陵都督府拜屈利失都督右武衛大將軍顯慶時與思結僕固羅叛天寶間來朝僕固在多覽葛之東始臣突厥後附薛延陀延陀滅其酋娑匐俟利發歌濫拔延內屬以其地為金微州拜歌濫拔延為都督右武

衛大將軍開元初為首領所殺其子即僕固懷恩也同
羅在薛延陀北多覽葛之東貞觀二年遣使入朝久之
請內屬置龜林都督府拜酋侯利發時健啜為都督左
領軍大將軍契苾在焉耆西北多覽葛之南其酋曰易
勿真莫賀可汗貞觀六年可汗死其弟莫賀咄之子何
力尚鈕率部來歸以其地為榆溪州永徽四年以其部
為賀蘭都督府隸燕然都護多覽葛在薛延陀東延陀滅
其酋侯斤多濫葛未與回紇皆入朝以其地為燕然

都督府授右武衛大將軍即為府都督死以多濫葛塞
蜀為大俟利發繼為都督跌跌始與拔野古等來朝以
其地為難田州開元初跌跌思泰自突厥默啜所來降
其後光進光顏皆以戰功賜姓李氏附屬籍葛邏祿本
突厥諸族永徽初高侃伐車鼻內屬顯慶二年以其地
置陰山大漠元池三都督府即用其酋長為都督然限
回紇故朝會不能自達至德後葛邏祿寢盛徙十姓可
汗故地盡有碎葉怛邏斯諸城拔悉蜜貞觀二十三年

始來朝天寶初與回紇葉護擊殺突厥可汗立拔悉蜜
大酋阿史那施為賀臘毗可汗遣使者入謝為葛邏祿
回紇所破奔北庭後朝京師地歸回紇

黠戛斯在焉耆之北本堅昆國語訛為黠戛斯貞觀二
十二年因鐵勒部入朝遣使者獻方物其酋俟利發入
朝太宗勞享之以其地為堅昆府拜俟利發都督左屯
衛大將軍隸燕然都護高宗時再來朝景龍中獻方物
玄宗世四朝乾元中為回紇所破後其酋阿朮破殺回

鵬可汗會昌中遣使上書大中朝冊為英武誠明可汗
咸通間三來朝又有伊州都播骨利幹白霄斛薛皆唐
時嘗通

奚與契丹別種嘗為匈奴所破保烏丸山元魏時自號
庫真奚居鮮卑故地東北接契丹西突厥南白狼河北
霄俗與突厥同逐水草畜牧居橐廬環車為營其君長
常以五百人衛牙中餘部散山谷間無賦入以射獵為
資喜戰鬪兵有五部部一俟斤主之盛夏必徙保冷陁

山山直端州西北至隋始去庫真但曰奚唐武德中高
開道借其兵再寇幽州長史王說擊破之貞觀三年始
來朝閱十七歲凡四朝貢帝伐高麗大酋蘇支從戰有
功不數年其長可度者內附帝為置饒樂都督府拜可
度者使持節六州諸軍事饒樂都督封樓煩縣公賜姓
李以阿會部為弱水州處和部為祈黎州與失部為落
環州度稽部為大魯州元俟析部為渴野州各以酋領
辱統主為刺史隸饒樂府復置東夷都護府於營州兼

統松漠饒樂顯慶間可度者死奚叛六年詔崔餘慶等
總護三都督討之斬其王萬歲通天中契丹反奚亦叛
與突厥相表裏號兩蕃延和元年遣孫佺李楷洛周以
梯帥兵襲其部為所敗殺傷數萬佺以梯皆禽送默啜
朝廷方多故不暇討開元二年舊書作三年使粵蘇悔落丐
降封饒樂郡王左金吾衛大將軍饒樂都督詔宗室出
女辛為固安公主妻其酋李大酺明年入朝成昏始復
營州都督府大酺後與契丹可突于闐死弟魯蘇領其

部襲王詔兼保塞軍經略大使牙官塞默羯謀叛公主
誘殺之帝嘉其功賜累萬會與其母告訐得罪更以盛
安公主女韋為東光公主妻之後三年封魯蘇奉誠郡
王右羽林衛將軍久之契丹可突于反脅奚衆并附突
厥魯蘇不能制奔榆闕公主奔平盧幽州長史趙含章
發軍討破之衆稍自歸明年信安王禕降其首李詩鎖
高等以其地為歸義州因以王詩拜左羽林大將軍本
州都督置其部幽州之偏詩死子延寵嗣與契丹又叛

為幽州張守珪所困延寵降復拜饒樂都督懷信王以
宗室出女楊為宜芳公主妻之延寵殺公主復叛詔立
它酋婆固為昭信王饒樂都督安祿山節度范陽詭邊
功數與麋鬪擒其酋李日越料所俘驍壯戍雲南終帝
世凡八朝獻至德大歷間十二貞元四年與室韋攻振
武後七年幽州殘其衆六萬德宗時兩朝獻元和元年
君梅落入朝拜檢校司空歸誠郡王以部酋索氏為左
威衛將軍檀薊州游奕兵馬使沒辱孤平州游奕兵馬

使皆賜姓李嘗陰結回鶻室韋兵犯西域振武憲宗時
四朝獻太和四年復盜邊盧龍李載義破之執大將二
百餘人縛其帥茹羯以獻文帝賜冠帶授右驍衛將軍
後五年大首領匿含朗來朝大中元年北部諸山奚悉
叛盧龍張仲武禽酋渠燒帳落二十萬取其刺史以下
面耳及羊牛輜貯獻京師咸通九年其王突董蘇使大
都督薩葛入朝是後契丹方強奚不敢抗舉部役屬之
苦其政稍引別部內附保端州北山遂為東西奚西奚

王去諸之子薩嘉後唐莊宗時賜姓名李紹威石晉時紹威子伊喇降于契丹東奚亦為契丹所併不復能自

見云

室韋契丹別種蓋丁零苗裔地據黃龍北傍徭越河東接黑水靺鞨西突厥南契丹其國無君長惟大酋皆號莫賀咄攝其部而附於突厥小或千戶大數千戶濱散川谷逐水草而處不稅斂每弋獵即嘯聚事畢去不相臣制故雖猛悍喜戰而卒不能為彊國酋帥死以子弟

繼無則推豪傑立之乘牛車渡水則束薪為桴或以皮
舟所居或皮蒙室或屈木以蘧蔭覆可載而行其畜無
羊少馬有牛不用有巨豕食之語言近鞞鞞分部二十
餘曰嶺西部山北部黃頭部大如者部小如者部婆蒿
部訥北部駱丹部悉處柳城東北近者三千遠六千里
而羸最西有烏蘇固部與回紇接當俱倫汨之西南自
汨而東有移塞沒部稍東有塞曷支部最强居噉水之
陰亦曰燕支河並東有和解部烏羅護部那禮部嶺西

部直北曰訥北支部北有大山山外曰大室韋瀕於室
建河河出俱倫迤而東河南有蒙瓦部其北落坦部水
東合那河忽汗河又東貫黑水靺鞨故靺鞨跨水有南
北部而東注於海拙越河東南亦與那河合其北有東

室韋貞觀五年

舊書作貞觀三年

來貢後再入朝長壽二年叛

李多祚擊定之景龍初復朝獻請助討突厥開元天寶
間凡十朝獻大厯中十一貞元四年與奚共寇振武節
度使唐朝臣方郊勞天子使者驚走室韋執詔使大殺

掠而去明年使者來謝罪太和中三朝獻大中中一來
咸通時大酋怛烈與奚昏遣使至京師後史官失傳

欽定續通志卷六百三十六

欽定四庫全書

欽定續通志卷六百三十七

四夷傳 三

吐蕃

嘉勒斯養 蘇毗
多彌 泥婆羅

吐谷渾

党項

于闐

天竺 師子

拂菻

高昌

焉耆

龜茲

疏勒

拔汗那

罽賓

康居九姓

大勃律

小勃律 識匿 苗失密

似沒 役盤

吐火羅

挹怛
石汗那

俱蘭

劫

謝

帆延

波斯

大食

層檀

吐蕃本西羌屬種落莫知所出唐以前未嘗通中國居

析支水西其祖曰鶻提勃悉野稍并諸羌據其地俗謂

疆雄曰贊丈夫曰普故其王號贊普貞觀八年贊普弄

贊始遣使來朝因求昏不許遂入寇詔侯君集等討之

弄贊引去遣使謝罪又請昏許之十五年妻以宗女文

成公主高宗即位擢弄贊附馬都尉西海郡王進封賓

王永徽初死無子立其孫贊普國事皆委其相祿東贊
時吐谷渾內附祿東贊怨忿擊破之朝廷遣使定亂祿
東贊明毅善用兵吐蕃倚之遂為疆國祿東贊死其子
欽陵贊婆悉多干

按新唐書作悉多干今從舊書

勃論竝當國盡破諸

羌咸亨初入殘羈縻十八州詔薛仁貴討之為欽陵所
敗遂陷吐谷渾復詔姜恪出討會恪卒班師贊普旋遣
大臣入朝上元二年又遣使請與吐谷渾修好帝不聽
明年攻鄯廓河芳四州詔周王顯相王輪會計不克行

又攻疊扶二州進攻安西命李敬元等擊之為所敗儀
鳳四年贊普死子罷弩悉弄立命贊婆率兵寇河源它
良非川左武衛將軍黑齒常之擊走之武后時屢詔諸
將進討皆中道罷如意元年大首領曷蘇謀率所屬降
后遣將軍張元遇率兵迎之次大度水國人禽曷蘇去
而他酋咎播又以羌蠻八千人降即其部置葉州擢咎
播刺史是歲將軍王孝傑大破吐蕃之衆四鎮盡復置
兵戍守證聖元年攻臨洮涼州遣使請罷戍兵求分十

姓地武后詔郭元振往使從其請吐蕃南境屬國泥婆
羅門等叛贊普自討死于軍諸子爭立國人立棄隸縮
贊為贊普景龍三年遣使請昏帝以雍王守禮女為金
城公主妻之吐蕃外雖和而陰銜怒即請河西九曲為
公主湯沐邑與之勢益張開元二年其相全達延將兵
十萬寇臨洮詔薛訥王晙等擊敗之自後邊將扞禦益
力然吐蕃寇盜無閒歲十年攻小勃律等國張孝嵩遣
兵擊敗之十五年王君奭大破其衆於青海西後君奭

為回紇所殺帝以蕭嵩張守珪代領其衆明年寇瓜州
守珪擊走之都督張志亮又破其軍於青海西時忠王
友皇甫惟明等以約和為言帝敕惟明以書賜金城公
主乃遣使納貢二十六年以節度使崔希逸背約大入
河西希逸死蕭晃率軍擊破之金城公主卒吐蕃悉衆
四十萬來攻入振武軍天寶元年隴右節度使皇甫惟
明破之自是頻歲入寇惟明及哥舒翰高仙芝相繼戰
皆禽馘巨首十三載贊普乞黎燕籠臘贊死子沙悉籠

臘贊嗣遣使修好安祿山亂數使請和帝雖審其誦姑
務紓患詔宰相郭子儀與盟寶應元年陷臨洮取秦城
渭等州明年破西山合水城明年入大震關取蘭河鄯
洮等州隴右地盡沒進攻涇州破邠州東略武功代宗
幸陝吐蕃入長安留十五日乃走帝還京退圍鳳翔僕
固懷恩反合其兵攻邠州郭晞夜擊之引去陷涼州永
泰元年請和懷恩又導吐蕃與回紇党項等至醴泉京
師戒嚴詔子儀等屯兵分道夾擊帝自率六軍擊之累

戰輒勝會懷恩死吐蕃無謀主與回紇爭長回紇怒詰子儀請擊吐蕃自效子儀許之遂大破之詔班師大厯二年又寇靈州子儀屯兵涇陽破之三年八月引衆十萬入靈邠二州為馬璘白元光所敗八年又寇涇邠渾瑊馬璘相繼掩襲射殺其酋將子儀復追破之吐蕃每歲議和中朝頻許之然無信常以兵騎寇盜德宗即位欲以德綏遠方詔還其所俘時乞立贊為贊普遣使入朝由是為盟好朱泚亂渾瑊以吐蕃兵破泚將韓旻於

武亭川北平來求地帝薄其勞賜帛萬匹吐蕃以為怨
貞元二年復犯涇隴邠寧四州為李晟所敗時其相尚
結贊攻據鹽夏乞和於馬燧燧入見奏請與盟詔渾瑊
為盟會使崔漢衡副之將盟其衆鼓譟瑊單騎走漢衡
等被執結贊以羌渾衆屯青石嶺分道趨隴沂陽剽掠
州縣諸將兵不敢出初吐蕃盜塞畏春夏疾疫常以秋
及是得唐俘給產質其挐因亦以盛夏入邊是時寧靈
受惠最甚唐地没入者多安西道絕詔渾瑊杜希全邢

君牙等合兵三萬築城靈武是時韋臯連破其衆後尚
結贊及贊普死足之煎嗣為贊普請修好帝以其無信
不受又入寇二十年足之煎死其弟嗣立憲宗即位遣
使修好元和十二年普贊又死可黎可足立十四年分
兵十五萬圍鹽州刺史李文悅合朔方將史敬奉擊破
之長慶元年來乞盟詔使劉元鼎等會守將與盟是後
比年遣使朝聘普贊死弟達磨嗣會昌二年達磨死無
子以妃絀兄尚延力子乞離胡為贊普羣下以非故王

後皆叛自相攻殺諸將乘亂收復亡失等州自是其國
浸弱然種部繁多自宋以後屢來貢獻無復統一其稍
大者有嘉勒斯賚初居頁恭城欲於河州立文法部屬
尊事之徙宗噶爾城又徙邈川與趙德明抗希望朝廷
恩命涇原鈐轄曹瑋言宜厚嘉勒斯賚以扼德明大中
祥符八年遣使來貢其年聚衆數十萬請討夏以自效
明道初授嘉勒斯賚寧遠大將軍愛州團練使徙居青
唐景祐中以嘉勒斯賚為保順軍節度觀察留後嘉勒

斯賚陰間元昊得其虛實數以奇計破元昊潘羅支舊部回紇種人往往歸之嘉勒斯賚由是富强累兼保順河西節度使洮涼兩州刺史治平二年死第三子棟戩嗣熙寧三年夏入寇環慶棟戩乘虛入其境大克獲王韶定熙河其首領青伊結果莊寇河州帝命邊臣招來之元豐四年宋師討夏棟戩分兵入援以功由常樂郡公進封武威郡王元祐元年死養子阿里庫本于闐人少從其母事棟戩元豐間蘭州之戰有功由肅州團練

使進防禦使棟戢無子立之既嗣遣使修貢元祐元年
以起復為河西軍節度使封寧塞郡公常使果莊拒洮
州果莊遣其子入寇其下不從阿里庫奉表謝罪詔許
貢如故詔聖三年卒子轄整嗣四年授河西軍節度使
寧塞郡公為其下所逐內徙鄧州崇寧元年卒嘉勒斯
賚嫡孫穆占者少依青唐族為部酋所立居洮州後徙
河州熙寧七年以二州來降拜榮州團練使遷合州防
禦使卒穆占降時詔賜姓名曰趙思忠其弟棟古曰趙

繼忠獯毗者西羌族役屬吐蕃號孫波在諸部最大唐
天寶中沒陵贊欲舉國內附為吐蕃所殺子悉諾率首
領奔隴右節度使哥舒翰護送闕下厚禮之多彌亦西
羌族役屬吐蕃貞觀六年遣使朝貢又有泥婆羅者在
吐蕃之西樂陵川初王那陵提婆之父為其叔所殺提
婆走依吐蕃貞觀中遣使至天竺道其國提婆乃遣使
入獻永徽時王尸利那連陀羅又遣使貢

吐谷渾居甘松山之陽洮水之西南抵白蘭池數千里

隋時其王慕容伏允號步薩鉢嘗寇邊煬帝遣鐵勒敗之復命觀王雄破其衆伏允亡入泥嶺部衆降置郡縣鎮戍以長子順為質因王之俄追還隋亂伏允還國唐高祖受命約伏允擊李軌自效伏允大喜引兵與軌戰遣使請順順至號為大寧王太宗時寇鄴州又掠岷州都督李道彥擊走之連歲寇涼州詔段志元梁洛仁等率契苾党項兵擊之時伏允耄其相天柱王用事拘行人趙德楷帝遣使曉敕不悛貞觀九年詔李靖侯君集

等進討連破之順之質隋伏允立其弟為太子順歸常
鞅鞅欲以功自結於唐乃斬天柱王舉國降伏允引千
餘騎遁磧中尋自經死國人立順內附詔封西平郡王
號趙胡呂烏甘足可汗順久質華國人不附卒為下所
殺立其子燕王諾曷鉢諾曷鉢幼臣下爭權帝詔侯君
集經紀之詔封諾曷鉢河源郡王號烏地也拔勒豆可
汗諾曷鉢入謝請昏以宗室女為弘化公主妻之高宗
立拜駙馬都尉諾曷鉢入朝帝又以宗室女金城縣主

妻其長子蘇度模末模末死主與次子左武衛大將軍
梁漢王閏盧摸末來請昏帝以宗室女金明縣主妻之
既而為吐蕃所攻諾曷鉢走涼州吐蕃遂有其地諾曷
鉢請內徙乾封初封封青海國王咸亨元年命薛仁貴
討吐蕃且訥諾曷鉢於故廷官軍敗于大非川舉吐谷
渾地皆陷三年徙疊水南又徙靈州帝為置安樂州拜
刺史諾曷鉢死子忠立忠死子宣超立聖歷三年拜左
豹韜員外大將軍襲故可汗號宣超死子曦皓立曦皓

死子兆立吐蕃復取安樂州退徙朔方河東語訛為退
渾貞元十四年以朔方節度副使左金吾衛大將軍慕容
復為長樂都督青海國王襲可汗號復死傳襲吐谷
渾自晉永嘉時有國至龍朔三年吐蕃取其地凡三百
五十年五代時但名吐渾部族益微後唐莊宗朝有首
領白承福依中山北石門為柵賜姓名李紹魯終唐時
嘗遣使朝貢石晉時為契丹役屬畏其苛暴出帝時曾
入朝又以其兵助禦契丹後為劉知遠所滅遂微不復

見

党項漢西羌別種古析支地也東距松州西葉護南春

桑迷桑等羌北吐谷渾山谷崎嶇三千里而羸以姓別

為部一姓又分為小部落大者萬騎小數千不能相統

故有細封

宋史作
細風

氏費聽氏往利氏頗超氏野辭氏房

當氏米禽氏

宋史作來禽
亦作來離

拓拔氏而拓拔最强唐貞觀

三年其酋細封步賴內附以其地為軌州授步賴為刺

史其後諸酋長多內附以其地為岨奉嚴遠四州即拜

刺史有拓拔赤辭來歸以其地為懿嗟麟可三十二州以松州為都督府赤辭擢西戎州都督賜姓李自是貢賦不絕自河首積石山而東皆為中國地後吐蕃寢盛拓拔畏偪內徙慶州地皆入吐蕃其處者為吐蕃役屬更號弭藥又有黑党項者居赤水西其長號敦善王吐谷渾款附後亦納款居雪山者曰破丑氏又有白蘭羌俗與党項同武德六年入朝七年以其地為維恭二州天授中內附戶凡十萬以其地為朝吳浮歸十州散居

靈夏間上元時其部屬皆入朝元和以後頗相率為盜
寇邊宣宗詔宰相白敏中及李業李拭等合兵討之其
種類殘破不敢內掠其拓拔氏有名思恭者咸通中據
宥州自稱刺史黃巢入長安與鄜州李孝昌誓討賊僖
宗以為左武衛將軍權知夏綏銀節度事中和二年詔
為京城西面都統檢校司空同中書門下平章事俄進
四面都統權知京兆尹賊平兼太子太傅封夏國公賜
姓李尋卒以其弟思諫代為定難節度使思孝為保大節

度使鄜防丹翟等州觀察使並檢校司徒同中書門下
平章事後思孝因亂取鄜州遂為節度使累兼侍中以
老薦弟思敬為保大軍兵馬留後俄為節度使宋太祖
初其大姓有密瑪者世居河右頗為邊捍授代州刺史
雍熙初諸族渠師附李繼遷為寇詔田仁期王誨討之
破其衆自是羌族多內附者即命為本州刺史淳化五
年授其長蘇拉繼哈雅烏下桑三人為懷化將軍貢里
威明密曲卓尼三人為歸德郎將後以乜遇為檢校司

空自後多賜將軍及檢校者至道元年埒克拉等族首
領瑪圭率屬附詔以瑪圭為歸德大將軍領恩州刺史
餘賜即將咸平二年瑪圭又領本州團練使五年密布
族尼瑪遣子入貢尼瑪數與繼遷戰鬪詔授為錦州團
練使其子弟首領以下授官有差帝聞賀蘭山盛族曰
小涼大涼與繼遷互相攻掠乃因密布特賜詔撫輯之
六年貢實勒族羅幹等率屬來以羅幹為本族指揮使
是時諸族為繼遷所署者多來歸帝以其有志內附皆

激獎之景德元年尼族巴黃率三百餘帳內屬巴黃本
大族素附契丹犯邊境契丹署為大尉至是亦來詔府
州厚賜茶綵計口賦粟其後諸族多納質歸化悉授官
至天禧間有仕至三班借職充差部巡檢者党項自是
皆內附矣

于闐或曰渙那亦曰屈丹曰于遁其居曰西山城俗機
巧事祇神浮屠法喜歌舞工紡績自漢武帝以來朝廷
詔書符節其王世守之唐初其王尉遲屋密嘗臣突厥

貞觀六年遣使入獻後三年遣子入侍阿史那社爾之
子龜茲也長史薛萬備至其國陳唐威靈其王伏闕信
懼隨使者來會高宗立授右衛大將軍子葉護玷為右
驍衛將軍上元初身率子弟酋領七十人來朝擊吐蕃
有功帝以其地為毗沙都督府析十州授伏闕雄都督
死子璆嗣璆死立尉遲伏師戰為王死伏闕達嗣達死
尉遲珪嗣珪死子勝嗣勝自有傳自安史之亂不復至
晉天福中其王李聖天自稱唐宗屬遣使來貢高祖命

供奉官張匡鄴持節冊聖天為大寶于闐國王宋建隆二年遣使貢乾德中沙門道圓自西城還經于闐與其朝貢使至開寶二年遣使貢四年其國僧吉祥以其國王書來言破疏勒國得舞象欲以為貢詔許之大中祥符二年其國王遣回鶻羅斯溫等貢名對請遣使安撫遠俗常以路遠命賜勞費賜詔書遣還自是迄於宣和朝貢不絕

天竺古身毒國後漢時求佛法於其國始通焉或曰摩

伽陀曰婆羅門居慈領南分東西南北中五天竺與大秦扶南交趾貿易人富樂有文字善推步曰梵天法書用貝多葉不飲酒殺生俗信盟誓傳禁咒隋時復不通煬帝遣裴矩通西域獨天竺拂菻不至中天竺王姓乞利啞氏武德時王尸羅逸多討四天竺悉臣之會僧元奘至其國言太宗神武四夷賓服狀貞觀十五年乃遣使上書自稱摩伽陀王帝命雲騎尉梁懷璚持節慰撫之復遣使者隨入朝二十二年遣右衛率府長史王元

策使其國未至王死國大亂其臣那伏帝阿羅那順自立發兵拒元策從騎數十皆戰沒元策奔吐蕃檄鄰國兵合討之禽阿羅那順以獻乾封二年五天竺皆來朝開元時中天竺遣使者三北天竺一南天竺亦來朝丐名其軍詔賜懷德軍周廣順三年西天竺僧薩滿多等十六族來宋開寶後天竺僧持梵夾來獻者不絕八年冬東天竺王子囊嘉特舒嚕來朝貢天竺法國王死太子襲位餘子皆為僧不復居本國有滿珠錫哩者王子

也隨中國僧至太祖令館於相國寺善持律都人傾嚮
焉財施盈室衆僧嫉之以其不解唐語偽為奏求還許
之詔下滿珠錫哩大驚不得已遲留數月而去太平興
國七年益州僧光遠至自天竺其王瑪特已附表賀雍
熙中衛州僧辭濟自西域還與胡僧密當羅奉北印度
王書來天聖二年九月西印度僧愛賢智信護等來獻
梵經各賜紫方袍束帶五年二月僧吉祥等五人以梵
書來獻賜紫方袍景祐三年正月僧善稱等九人貢梵

經佛骨及銅牙菩薩像賜以束帛師子者亦天竺旁國
居西南海中多奇寶能馴養師子因以名唐總章三年
遣使來朝天寶初王尸羅迷伽再遣使貢

拂菻古大秦國也亦曰海西國東南接波斯唐貞觀十
七年王波多力遣使來獻下詔答賚時大食稍強伐之
遂臣屬焉乾封及大足再朝獻開元七年因吐火羅大
酋獻師子羚羊朶元豐四年其王默呼伊楞噶薩納始
遣使來獻元祐六年使兩至詔亦優賜之

高昌漢車師前王之地南距于闐西南距大食波斯後
魏初有闐與及沮渠無諱皆嘗自署太守其後蠕蠕始
立闐伯周為王高昌有王始於此闐氏滅歷張孟明馬
儒至麴嘉而始大嘉之孫伯雅嘗朝貢於隋妻以戚屬
宇文氏女華容公主唐武德初伯雅死子文泰立來告
命使臨弔貞觀四年文泰來朝禮賜甚厚後與西突厥
通壅梗西城朝貢道破伊吾焉耆等國焉耆王來訴遣
使責讓不聽又欲攻奪薛延陀延陀可汗請為軍導乃

遣侯君集等率突厥契苾騎討之。文泰初以唐師遠出糧必不逮及聞師至磧口悸駭發病死。子智盛立。君盛攻戰甚力。智盛遺書君集求見赦。君集責以悔禍當面縛軍門。智盛不答。軍薄其城乃降。敕所得高昌地為州。縣號西昌州。改曰西州。置安西都護府。拜智盛為左武衛將軍。金城郡公。弟智湛為右武衛中郎將。天山郡公。高昌既為西州。至安史亂遂復立為國。宋時亦稱回鶻。按唐書稱高昌麹氏傳國九世而亡其國為州縣宋史稱安史之亂地陷沒乃復為國其立國之初國王之姓

無所考

乾德三年西州回鶻可汗遣僧來獻太平興國六年其王稱西州外生師子王阿爾斯蘭汗遣都督瑪實衮來獻太宗遣供奉官王延德殿前承旨白鄖使其國八年其使溫古嚕來貢景德元年又遣使金延福來貢焉耆國與高昌邇茲尉犁烏孫諸國為隣唐貞觀六年其王龍突騎支遣使來朝尋為高昌所陷侯君集討高昌突厥騎支引兵佐之君集歸其所俘及城後與西突厥為昏不朝貢詔郭孝恪為西州道總管討之囚突騎

支及妻子送洛陽以其弟栗婆準攝國事為從兄薛婆
阿那支所殺阿史那社爾禽阿那支斬之立突厥支弟
婆伽利為王以其地為焉耆都督府婆伽利死國人請
還突騎支高宗許之歸國死龍懶突立開元七年龍懶
突死焉吐拂延立迄天寶常朝貢自天寶以後莫可考
龜茲亦曰屈茲其國主自稱師子王與宰相九人同治
事土宜麻麥秔稻葡萄出黃金書旁行事浮屠法王姓
白氏居伊邏盧城北阿羯田山自漢建武時通其後叛

服不常唐高祖受禪王蘇伐勃駛遣使入朝子蘇伐疊
嗣立號時健莫賀俟利發貞觀四年獻馬賜璽書撫慰
後臣西突厥郭孝恪伐焉耆乃與焉耆引援自是不朝
貢蘇伐疊死弟訶黎布失畢立二十一年帝怒其佐焉
耆叛命崑邱道行軍大總管阿史那社爾等進討大破
之追禽其王於撥換城其相那利夜逸以西突厥并國
人萬餘來戰那利為韓威等所執國遂定社爾立王弟
葉護主其國獻俘帝赦訶黎布失畢拜左武衛中郎將

高宗復封為龜茲王後國亂死以其地為龜茲都督府
王其子素稽徙安西都護府於其國故安西為西州都
督府即拜素稽為左驍衛大將軍兼安西都護上元中
獻名馬天授三年王延田陝來朝始儀鳳時吐蕃攻焉
耆以西四鎮皆沒長壽元年武威道總管王孝傑破吐
蕃乃復四鎮及安西都護府以兵三萬鎮守議者以沙
磧荒絕民苦輸輓請棄之武后不聽時都護以政績稱
者田揚名郭元振張孝嵩杜暹云開元七年王莫苾死

子多帀立改名孝節十八年遣弟孝義來朝自後屢朝
貢宋自天聖至景祐五入貢熙寧四年使李延慶曹福
來五年又使盧大明都督來紹聖三年又使大首領阿
爾薩里三人奉表至并貢方物詔優答遣還其後絕不
聞疏勒亦漢時通唐初其王姓裴氏自號阿摩支居伽
師城與突厥為婚貞觀九年遣使者來獻又四年復來
貢儀鳳時吐蕃破其國開元十六年始遣喬夢松冊其
君安定為疏勒王天寶十二載遣使朝

拔汗那元魏時謂之破洛那居西隄城在真珠河北唐
貞觀中王契苾為西突厥瞰莫賀咄所殺阿瑟那鼠匿
奪其城鼠匿死子遏波之立與契苾兄子阿了參分治
其衆顯慶時遏波之遣使朝貢高宗以其所居渴塞城
為休遁州授都督阿了參為刺史自是歲朝貢開元二
十七年王阿悉爛達干助平吐火仙冊拜奉化王天
寶三載改其國號寧遠帝以外家姓賜其王曰竇又封
宗室女為和義公主降之十三載王忠節遣子薜裕朝

留宿衛授左武衛將軍

屬賓隋時為漕國在蔥嶺西南王居修鮮城常役屬大
月氏俗治浮屠法唐武德二年遣使貢貞觀中獻名馬
遣果毅何處羅拔等厚齎賜其國國人共傳王始祖曰
馨孽至曷擷支傳十二世顯慶三年以其地為修鮮都
督府神龍初拜其王修鮮等十一州諸軍事修鮮都督
開元七年冊其王為葛邏達支特勒後烏散特勒灑年
老請以子拂菻屬婆嗣聽之天寶四年冊其子勃匄準

為襲罽賓及烏菴國王乾元初遣使朝貢至宋事蹟不可考

康居王姓溫本月氏人始居祁連北昭武城為突厥所破稍南依蔥嶺枝庶分王曰安曰曹曰石曰米曰何曰火尋曰戊地曰史世謂之九姓皆氏昭武隋時其王屈木支娶西突厥女遂臣突厥唐武德十年始遣使來獻貢觀五年遂請臣歲入貢永徽時以其地為康居都督府即授其王拂呼縵都督萬歲通天中以大首領篤娑

鉢提為王死子泥涅師師立死國人立突昏為王開元
初來貢其王烏勒伽與大食亟戰不勝來乞師不許久
之請封其子咄曷為曹王默啜為米王許之烏勒伽死
遣使封咄曷為欽化王大安者西瀕烏澹河武德時遣
使入朝貞觀初獻方物厚禮其使後其王訶陵迦又來
獻自言一姓相承二十二世云又有東安國顯慶時以
其地為安息木鹿二州即授其王昭武殺昭武閉息為
刺史開元十四年其王篤薩波提遣弟阿悉爛達拂耽

發黎來朝後八年來獻東曹者武德中與康居同遣使
朝天寶十一載其王設阿忽與安王請擊黑衣大食帝
慰撫之西曹者隋曰曹武德中亦入朝天寶元年王哥
邏僕羅遣使獻方物詔封懷德王中曹者居迦底真城
石國王治拓枝城隋大業初西突厥殺其王以特勒匄
職統其國武德貞觀間數獻方物顯慶三年以其職羯
城為大宛都督府授其王瞰土屯攝舍提于屈脂穆都
督開元初封其君莫賀咄吐屯有功為石國王二十八

年冊順義王明年王伊捺吐屯屈勒上言請討大食不
許天寶初封王子那俱車鼻施為懷化王安西節度高
仙芝劾其無藩臣禮請討之王約降仙芝遣使者護送
至開遠門俘以獻斬闕下自是西域皆走大食為之臣
至寶應時遣使朝貢米者永徽時為大食所破顯慶三
年以其地為南謚州授其君昭武開拙為刺史自是朝
貢不絕開元十八年大首領末野門來朝天寶初封其
君為恭順王何者貞觀十五年遣使入朝永徽時以其

地為貴霜州授其君昭武婆達地刺史火尋天寶十載其君稍施芬遣使朝獻寶應時復入朝使者隋大業中通其君狄遮號最強貞觀十六年君沙瑟畢獻方物顯慶時以其地為佉沙州授其君昭武失阿喝刺史開元十五年君忽必多來獻天寶中詔改史為來威國

火勃律直吐蕃西與北天竺鄰萬歲通天及開元時嘗遣使朝貢冊其君蘇弗舍利支離泥為王死又冊蘇麟陀逸之嗣王凡再遣使貢方物小勃律開元初王沒謹

忙來朝以其地置綏遠軍迫於吐蕃沒謹忙求救北廷
節度使張孝嵩遣疏勒副使張思禮率銳兵倍道往沒
謹忙亦出兵大破之詔冊為小勃律王沒謹忙死子難
泥立死兄麻來兮立死蘇失利之立復臣吐蕃貢獻不
入天寶六載詔高仙芝伐之以蘇失利之歸平其國詔
改曰歸仁置歸仁軍箇失密北距勃律五百里開元初
遣使朝八年冊其王真陀羅祕利為王死弟木多筆立
復遣使朝求冊立自是職貢有常識匿在蔥領西五百

里貞觀二十年與似沒役槃二國使者皆來朝開元十二年授其王布遮波資金吾衛大將軍天寶六載王跌失伽延從討勃律戰死擢其子都督左武衛將軍似沒者其土俗與康居同役槃亦與康居鄰出良馬

吐火羅居葱嶺西烏澹河之南古大夏地與挹怛雜處其王號葉護唐武德貞觀時再遣使貢顯慶中以其阿綏城為月氏都督府析小城為二十四州授王阿史那都督後二年遣使來朝神龍元年王那都泥利遣弟僕

羅入朝留宿衛天寶間冊其君骨拙祿頓達度為吐火
羅葉護挹怛王其後吐蕃將攻吐火羅於是葉護失里
忙伽羅巧安西兵助討帝為出師破之乾元初與西域
九國發兵為天子討賊肅宗詔隸朔方行營挹怛者漢
大月氏種本名噉噠其王姓也後裔以姓為國復訛為
挹怛天寶中遣使朝貢俱蘭與吐火羅接貞觀二十年
其王忽提婆遣使來獻書初者居葱嶺中西北與挹怛
接武德二年遣使來獻謝颺居吐火羅西南顯慶時本

名訶達羅支武后改曰謝颶景雲初遣使朝貢後臣屬
賓開元八年始冊葛達羅支頡利發誓屈爾為王至天
寶中數朝獻其東北四百里為帆延居斯畢莫運山之
旁貞觀中遣使朝顯慶三年以其羅爛城置寫鳳都督
府縛時城置悉萬州授王訇寫鳳州都督管內五州諸
軍事自是朝貢不絕石汗那在帆延北開元天寶中再
朝獻俱密在吐火羅東北其王突厥延陀種貞觀十六
年遣使朝開元中其王那羅延來獻自陳為大食暴賦

帝慰諭遣之天寶時王伊悉爛俟斤又獻馬護密元魏
所謂鉢和者亦吐火羅故地顯慶時以地為烏飛州王
沙鉢羅頡利發為刺史役屬吐蕃開元八年冊其王羅
旅伊陀骨咄祿多毗勒莫賀達摩薩爾為王十六年來
獻明年復遣使來獻王死冊其從弟護真檀嗣王二十
九年入朝拜左金吾衛將軍天寶八載復來朝乾元元
年王紇設伊俱鼻施來朝賜氏李又有骨咄開元十七
年王俟斤遣子來朝二十一年王頡利發獻女樂又遣

大首領來朝天寶十一載冊其王羅金節為葉護

波斯居達過水西東與吐火羅康居接北鄰突厥可薩
部西南皆濱海隋末西突厥葉護可汗殘其國殺王庫
薩和其子施利立葉護使部帥監統施利死遂不肯臣
立庫殺和女為王突厥又殺之施利之子單羯方奔拂
蘇國人迎立之是為伊怛支死兄子伊嗣俟立唐貞觀
十二年遣使者没似半來朝伊嗣俟不君為大酋所逐
奔吐火羅半道大食擊殺之子卑路斯入吐火羅以免

會大食解而去吐火羅以兵納之龍朔初又訴為大食所侵是時天子方遣使西域分置州縣以疾陵城為波斯都督府即拜卑斯路為都督其地多為大食所并咸亨中入朝授右武衛將軍死先是其子泥涅師為質調露元年詔裴行儉護送泥涅師不敢入其國客吐火羅二十年部落益離散景龍初復來朝授左威衛將軍病死西部獨存開元天寶間遣使來獻大厯時復來又有陀拔斯單者世為波斯東大將波斯滅不肯臣大食天

寶五載王忽魯汗遣使來朝封歸信王後八年遣子來朝尋為黑衣所滅

大食國本波斯別種隋大業中波斯有桀黠者探穴得丈石以為瑞乃糾衆剽掠資貨浸盛遂自立為王據有波斯西境國人討之者皆敗破拂菻南侵婆羅門并諸國勝兵至四十萬唐永徽二年大食王敏蜜與莫末膩始遣使朝貢自言王大食氏有國三十年傳二世開元初復遣使貢十四年遣蘇黎滿獻方物拜果毅賜袍帶其

王盆泥末換之前謂之白衣大食阿蒲羅拔之後謂之
黑衣大食阿蒲羅拔死弟阿蒲恭拂立至德初遣使朝
貢代宗取其兵平兩京阿蒲恭拂死子迷地立傳弟訶
論貞元時與吐蕃相攻無間歲故吐蕃鮮盜邊十四年
遣使者舍嵯烏鷄沙北三人朝皆拜中即將遣還其後
絕不聞矣乾德四年僧行勤遊西域因賜其國王書詔
來之開寶元年來貢四年又貢命其使為懷化將軍六
年七年九年皆來貢太平興國中再遣使來貢淳化四

年遣其副酋長李亞勿來貢其國舶主蒲希密至海南以病不能詣闕附表來獻賜敕書錦袍銀器等答之至道元年其子蒲押陀黎又奉蒲希密表來貢并謝前賜太宗問其國云與大秦國鄰為其統屬今本國所管民纔數千其山澤所出惟犀象香藥留數月遣回降詔答賜希密黃金準其貢直自後歷世朝貢不絕建炎三年遣使貢寶玉珠貝帝謂侍臣曰捐數十萬緡以易無用之珠玉曷若惜財以養戰士詔張浚却之優賜以答其意

紹興元年復遣使貢

層檀國在南海旁宋熙寧四年始入貢海道使風行百六十日經勿巡古林三佛齊國乃至廣州其王名亞美羅亞眉蘭傳國五百年十世矣人語音如大食元豐六年使人層伽尼再至神宗念其絕遠頒賚有加焉

欽定續通志卷六百三十七